

গণপ্রজাতন্ত্রী বাংলাদেশ সরকার  
তথ্য অধিদফতর  
বাংলাদেশ সচিবালয়  
ঢাকা

সংবাদ গতিধারা

জাতীয় দৈনিকসমূহে প্রকাশিত সংবাদ, সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ৭৬/২০১৭-১৮

ঢাকা, সোমবার ১৬ অক্টোবর ২০১৭, ১ কার্তিক ১৪২৪

আজকের দৈনিক পত্রিকাগুলো নিম্নলিখিত বিষয় প্রাধান্য দিয়ে খবর ছেপেছে :

- ১। সুপ্রিমকোর্ট প্রশাসনে রদবদল  
প্রধান বিচারপতির বিরুদ্ধে অভিযোগ তদন্ত করবে দুদক : আইনমন্ত্রী
- ২। রোহিঙ্গাদের জন্য ফিল্ড হাসপাতাল বানানোর ঘোষণা মালয়েশিয়ার উপপ্রধানমন্ত্রীর
- ৩। রোহিঙ্গা সংকট : ব্রাসেলসে আজ বৈঠকে বসছেন ইইউ'র পররাষ্ট্রমন্ত্রীরা  
আইওএম প্রধান বাংলাদেশ সফরে
- ৪। রাশিয়ার সর্বোচ্চ রাষ্ট্রীয় খেতাবে ভূষিত হলেন সাবেক হোসেন চৌধুরী
- ৫। উচ্চশিক্ষার উন্নয়নে কৌশলগত পরিকল্পনা করা হচ্ছে : শিক্ষামন্ত্রী
- ৬। ২০২১ সালের মধ্যে মধ্যম আয়ের দেশ হবে বাংলাদেশ : স্বরাষ্ট্রমন্ত্রী
- ৭। গ্রামাঞ্চলে ১০ হাজার নতুন ফ্ল্যাট হবে : পূর্তমন্ত্রী
- ৮। ডিএনডির জলাবদ্ধতা নিরসনে কাজ শুরু : পানিসম্পদমন্ত্রী
- ৯। আজ বিশ্ব খাদ্য দিবস
- ১০। শ্রেণিকক্ষে মোবাইল ব্যবহারে নিষেধাজ্ঞা মাউশি'র

## ১। সুপ্রিমকোর্ট প্রশাসনে রদবদল

প্রধান বিচারপতির বিরুদ্ধে অভিযোগ তদন্ত করবে দুদক : আইনমন্ত্রী

সুপ্রিমকোর্ট প্রশাসনের শীর্ষপর্যায়ের পদগুলোতে রদবদল করা হয়েছে। রেজিস্টার জেনারেল, হাইকোর্টের রেজিস্টার, অতিরিক্ত রেজিস্টার, ডেপুটি রেজিস্টার পর্যায়ের দশ বিচার বিভাগীয় কর্মকর্তাকে বদলি করা হয়েছে। সুপ্রিমকোর্টের সাথে পরামর্শক্রমে প্রশাসনের শীর্ষপর্যায়ের এসব কর্মকর্তাকে দেশের বিভিন্ন জেলা আদালতে বদলি করেছে আইন মন্ত্রণালয়। সূত্র-ইত্তেফাক, সংবাদ, নিউ নেশন, এশিয়ান এজ, অবজারভারসহ অধিকাংশ পত্রিকা এ বিষয়ে লিড নিউজ ছেপেছে।

প্রধান বিচারপতি সুরেন্দ্র কুমার সিনহার বিরুদ্ধে যেসব অভিযোগ উঠেছে সেগুলো সবই দুর্নীতি দমন কমিশনের (দুদক) এখতিয়ারভুক্ত। অনুসন্ধানে সত্যতা পাওয়া গেলে আইন তার নিজস্ব গতিতে চলবে। আইন, বিচার ও সংসদবিষয়ক মন্ত্রী আনিসুল হক গতকাল (১৫ অক্টোবর রোববার) আইন মন্ত্রণালয়ের সভাকক্ষে এক সংবাদ ব্রিফিংয়ে এসব কথা বলেন। আইনমন্ত্রী বলেন, প্রধান বিচারপতির ছুটির আবেদন ও বিদেশ যাওয়া নিয়ে অনেক কথা হচ্ছে। বিতর্কেরও সৃষ্টি করা হচ্ছে, যার যুক্তিসংগত কোনো কারণ নেই। রাজনৈতিক ষড়যন্ত্রের অংশ হিসেবে এসব করা হচ্ছে। সূত্র-প্রথম আলো, জনকণ্ঠ, ইন্ডিপেনডেন্ট, ডেইলি সান পত্রিকায় এ বিষয়ে লিড নিউজ ছেপেছে।

## ২। রোহিঙ্গাদের জন্য ফিল্ড হাসপাতাল বানানোর ঘোষণা মালয়েশিয়ার উপপ্রধানমন্ত্রীর

আশ্রিত ৩ লাখ রোহিঙ্গার জন্য আগামী ২-৩ মাসের মধ্যে একটি ফিল্ড হাসপাতাল বানিয়ে দেওয়ার ঘোষণা দিয়েছেন মালয়েশিয়ার উপপ্রধানমন্ত্রী ড. আহমদ জাহিদ হামিদি। রোহিঙ্গা সংকট নিয়ে আলোচনা করতে দু'দিনের সফরে গতকাল (১৫ অক্টোবর রোববার) ঢাকায় পৌঁছে বাংলাদেশের পররাষ্ট্রমন্ত্রী আবুল হাসান মাহমুদ আলী'র সঙ্গে এক দ্বিপক্ষীয় বৈঠক করেন তিনি। গতকাল রাষ্ট্রীয় অতিথি ভবন পদ্মায় বাংলাদেশ ও মালয়েশিয়ার মধ্যে দ্বিপক্ষীয় বৈঠকশেষে সাংবাদিকদের তিনি এ কথা বলেন। সূত্র-যুগান্তর (শেষ পৃ.ক.১), সমকাল (পৃ.২,ক.৬), ডেইলি সান (শেষ পৃ.ক.১), নিউ এজ (পৃ.১,ক.২)।

## ৩। রোহিঙ্গা সংকট : ব্রাসেলসে আজ বৈঠকে বসছেন ইইউ'র পররাষ্ট্রমন্ত্রীরা

আইওএম প্রধান বাংলাদেশ সফরে

রাখাইনে রোহিঙ্গাদের ওপর নিপীড়ন বন্ধ করণীয় নিয়ে আজ ১৬ অক্টোবর সোমবার ব্রাসেলসে বৈঠকে মিলিত হচ্ছেন ইউরোপীয় ইউনিয়নের পররাষ্ট্রমন্ত্রীরা। এতে মিয়ানমারের জেনারেলদের সঙ্গে সম্পর্ক ছিন্ন করার একটি প্রস্তাব পাস হতে যাচ্ছে। ২৮ দেশভুক্ত এ জোটের কূটনীতিকদের সূত্রে এ তথ্য প্রকাশিত হয়। গত ১৪ অক্টোবর শনিবার নিরাপত্তা পরিষদের এক বৈঠকেও জাতিসংঘের সাবেক মহাসচিব কফি আনান মিয়ানমারের ওপর চাপ সৃষ্টির জন্য আন্তর্জাতিক সম্প্রদায়ের কাছে আহ্বান জানিয়েছেন। সূত্র-যুগান্তর (পৃ.১,ক.৪),

আন্তর্জাতিক অভিবাসন সংস্থা'র (আইওএম) প্রধান উইলিয়াম লেসি সুইং গতকাল (১৫ অক্টোবর রোববার) চারদিনের সফরে বাংলাদেশে এসেছেন। রোহিঙ্গা পরিস্থিতি পর্যবেক্ষণ করার জন্য ঢাকায় এসেছেন তিনি। সূত্র-জনকণ্ঠ (শেষ পৃ.ক.৮), ইন্ডিপেনডেন্ট (শেষ পৃ.ক.১), নিউ এজ (শেষ পৃ.ক.৭)।

## ৪। রাশিয়ার সর্বোচ্চ রাষ্ট্রীয় খেতাবে ভূষিত হলেন সাবের হোসেন চৌধুরী

ইন্টার-পারলামেন্টারি ইউনিয়নের (আইপিইউ) প্রেসিডেন্ট এবং বাংলাদেশ জাতীয় সংসদের সদস্য সাবের হোসেন চৌধুরীকে বিদেশি নাগরিকদের জন্য প্রদত্ত রাশিয়ার সর্বোচ্চ রাষ্ট্রীয় পদক 'অর্ডার অভ ফ্রেন্ডশিপ' প্রদান করেছেন দেশটির প্রেসিডেন্ট ভ্লাদিমির পুতিন। গত ১৪ অক্টোবর শনিবার রাশিয়ার সেন্ট পিটার্সবার্গে আইপিইউ এর ১৩৭তম সম্মেলন উদ্বোধন অনুষ্ঠানের প্রাক্কালে তাঁকে এ সম্মাননা প্রদান করা হয়। গতকাল (১৫ অক্টোবর রোববার) ফ্রেমলিন ও মস্কোর বাংলাদেশ দূতাবাসের পৃথক বিবৃতিতে একথা বলা হয়। ফ্রেমলিনের বিবৃতিতে বলা হয়, রাশিয়ার প্রেসিডেন্ট আইপিইউ'র প্রেসিডেন্ট সাবের হোসেন চৌধুরীকে অর্ডার অভ ফ্রেন্ডশিপ সম্মানে ভূষিত করেছেন। এতে বলা হয়, ইন্টার-পারলামেন্টারি সম্পর্কের উন্নয়ন, রাশিয়ার ফেডারেল এসেম্বলি ও আইপিইউ'র মধ্যে সহযোগিতা ও

পারস্পরিক সমঝোতা উন্নয়নে গুরুত্বপূর্ণ অবদানের জন্য তাঁকে এ পদক প্রদান করা হয়। সূত্র-সংবাদ (শেষ পৃ.,ক.১), ইন্ডেফাক (পৃ.২,ক.৫), এশিয়ান এজ (শেষ পৃ.,ক.৭), ডেইলি সান (শেষ পৃ.,ক.৫)।

=৩=

#### ৫। উচ্চশিক্ষার উন্নয়নে কৌশলগত পরিকল্পনা করা হচ্ছে : শিক্ষামন্ত্রী

দেশের উচ্চশিক্ষা বিশ্বমানের উন্নয়নের লক্ষ্যে সরকার কাজ করে যাচ্ছে জানিয়ে শিক্ষামন্ত্রী নুরুল ইসলাম নাহিদ বলেছেন, ২০৩০ সাল নাগাদ উচ্চশিক্ষার জন্য একটি কৌশলগত পরিকল্পনা গ্রহণ করা হচ্ছে। এজন্য বিভিন্ন কমিটি তাদের সুপারিশমালা পেশ করেছে এবং একটি খসড়া পরিকল্পনা প্রস্তুত করা হয়েছে। মন্ত্রী গতকাল (১৫ অক্টোবর রোববার) ঢাকায় সিরডাপ অডিটরিয়ামে 'ড্রাফট স্ট্র্যাটেজিক প্লান ফর হাইয়ার এডুকেশন ইন বাংলাদেশ : ২০১৭-২০৩০' শীর্ষক এক অনুষ্ঠানে প্রধান অতিথির বক্তৃতায় একথা বলেন। তিনি জানান, উচ্চশিক্ষার মানউন্নয়নে অ্যাক্রিডিটেশন কাউন্সিল আইন পাস হয়েছে। উচ্চশিক্ষা কমিশন গঠন করা হবে। সূত্র-সংবাদ (পৃ.৪,ক.৫), যুগান্তর (পৃ.১৭,ক.৬), এশিয়ান এজ (পৃ.৩,ক.২), ডেইলি সান (পৃ.২,ক.২)।

#### ৬। ২০২১ সালের মধ্যে মধ্যম আয়ের দেশ হবে বাংলাদেশ : স্বরাষ্ট্রমন্ত্রী

স্বরাষ্ট্রমন্ত্রী আসাদুজ্জামান খাঁন কামাল বলেছেন, বাংলাদেশ ২০২১ সালের মধ্যে মধ্যম আয়ের এবং ২০৪১ সালের মধ্যে আধুনিক প্রযুক্তিনির্ভর উন্নত দেশে পরিণত হবে। এরই মধ্যে শান্তির রোল মডেল হিসেবে বিশ্বের মানচিত্রে আবির্ভূত হয়েছে বাংলাদেশ। এসব সম্ভব হয়েছে প্রধানমন্ত্রী শেখ হাসিনার দক্ষ নেতৃত্বে। স্বরাষ্ট্রমন্ত্রী গতকাল (১৫ অক্টোবর রোববার) গাজীপুরে সফিপুর আনসার ভিডিপি একাডেমিতে আনসার ও ভিডিপি'র ৩৪তম বিসিএস (আনসার) কর্মকর্তাদের মৌলিক প্রশিক্ষণ ও এমএইচএস কোর্সের সমাপনী কুচকাওয়াজ অনুষ্ঠানে প্রধান অতিথির বক্তব্যে এসব কথা বলেন। স্বরাষ্ট্রমন্ত্রী আনসার সদস্যদের উদ্দেশ্যে বলেন, আপনাদের অর্জিত মেধা, শ্রম ও দক্ষতা আনসার ও গ্রাম প্রতিরক্ষাবাহিনীকে একটি মর্যাদাশীল বাহিনীতে পরিণত করবে। সূত্র-যুগান্তর (পৃ.১৭,ক.৮), ডেইলি সান (পৃ.২,ক.৩), নিউ নেশন (শেষ পৃ.,ক.১)।

#### ৭। গ্রামাঞ্চলে ১০ হাজার নতুন ফ্ল্যাট হবে : পূর্তমন্ত্রী

বাড়ি নির্মাণকে কেন্দ্র করে কৃষিজমি ধ্বংস মোকাবিলায় শীঘ্রই গ্রামাঞ্চলে দশ হাজার নতুন ফ্ল্যাট নির্মাণ করা হবে বলে জানিয়েছেন গৃহায়ন ও গণপূর্তমন্ত্রী ইঞ্জিনিয়ার মোশাররফ হোসেন। গতকাল (১৫ অক্টোবর রোববার) বঙ্গবন্ধু আন্তর্জাতিক সম্মেলনকেন্দ্রে ব্র্যাক, গৃহায়ন কর্তৃপক্ষ, নগর উন্নয়ন অধিদফতর, মিউনিসিপ্যাল অ্যাসোসিয়েশন এবং ইনস্টিটিউট অব প্ল্যানার্স কর্তৃক যৌথভাবে আয়োজিত 'নগরের দরিদ্রদের জন্য গৃহায়নে অর্থায়ন' শীর্ষক জাতীয় সম্মেলনে প্রধান অতিথির বক্তব্যে তিনি এ কথা বলেন। মন্ত্রী বলেন, নগরদারিদ্র্যের শিকার বস্তিবাসীদের জন্য সরকার মিরপুরের বাউনিয়া বাঁধ এলাকায় ১০ একর জমির ওপর ১০ হাজার ফ্ল্যাট নির্মাণ করছে। এর মধ্যে ৫৫০টি ফ্ল্যাটের নির্মাণকাজ শিগগিরই শুরু হবে। খুব অল্প ও সহজে পরিশোধযোগ্য ভাড়াভিত্তিতে এসব ফ্ল্যাটে বস্তিবাসী থাকতে পারবেন। সূত্র-সংবাদ (শেষ পৃ.,ক.১), যুগান্তর (পৃ.১৭,ক.৭), এশিয়ান এজ (পৃ.১১,ক.৪), ডেইলি সান বিজনেস পাতা (পৃ.১,ক.৫)।

#### ৮। ডিএনডি'র জলাবদ্ধতা নিরসনে কাজ শুরু : পানিসম্পদমন্ত্রী

পানিসম্পদমন্ত্রী আনিসুল ইসলাম মাহমুদ বলেছেন, আগামী দু'সপ্তাহের মধ্যে ঢাকা-নারায়ণগঞ্জ-ডেমরা (ডিএনডি) বাঁধের অভ্যন্তরে জলাবদ্ধতা নিরসনের কাজ শুরু হবে। সেনাবাহিনীর তত্ত্বাবধানে ৫৫৮ কোটি টাকার এ প্রকল্পের কাজ ২০১৯ সালের মধ্যে শেষ হবে। গতকাল (১৫ অক্টোবর রোববার) নারায়ণগঞ্জ ক্লাব কমিউনিটি সেন্টার মিলনায়তনে এক প্রেস ব্রিফিংয়ে তিনি এসব কথা বলেন। প্রেস ব্রিফিংয়ে তিনি তাৎক্ষণিকভাবে ডিএনডিবাসীর জলাবদ্ধতার ভোগান্তি লাঘবে অতিরিক্ত পাম্প বসানোর আশ্বাস দেন। সূত্র-ভোরের কাগজ (পৃ.৫,ক.১), যুগান্তর (পৃ.৩,ক.৬)।

#### ৯। আজ বিশ্ব খাদ্য দিবস

আজ ১৬ অক্টোবর সোমবার বিশ্ব খাদ্য দিবস। বিশ্বের অন্যান্য দেশের মতো বাংলাদেশেও নানান কর্মসূচির মধ্যে দিয়ে দিবসটি পালিত হবে। এ উপলক্ষে বিভিন্ন কর্মসূচি নিয়েছে সরকারি ও বেসরকারি বিভিন্ন সংস্থা। বাংলাদেশের বর্তমান প্রেক্ষাপটে এবার দিবসটির প্রতিপাদ্য ‘অভিবাসনের ভবিষ্যৎ বদলে দাও, খাদ্য- নিরাপত্তা ও গ্রামীণ উন্নয়নে বিনিয়োগ বাড়াও’। দিবসটি উপলক্ষে রাষ্ট্রপতি মো. আবদুল হামিদ ও প্রধানমন্ত্রী শেখ হাসিনা পৃথক বাণী দিয়েছেন। সূত্র-সমকাল (পৃ.১৯,ক.৮), ইত্তেফাক (পৃ.১৫,ক.৮), নিউ এজ (শেষ পৃ.,ক.২), বাংলাদেশ টুডে (পৃ.২,ক.৫)।

=8=

### ১০। শ্রেণিকক্ষে মোবাইল ব্যবহারে নিষেধাজ্ঞা মাউশি’র

মাধ্যমিক ও উচ্চ মাধ্যমিক স্তরের শিক্ষাপ্রতিষ্ঠানের ক্লাসরুমে শিক্ষক ও শিক্ষার্থীদের মোবাইল ফোন ব্যবহারের ওপর আনুষ্ঠানিকভাবে নিষেধাজ্ঞা জারি করা হয়েছে। মাধ্যমিক ও উচ্চশিক্ষা অধিদফতর (মাউশি) গত ১২ অক্টোবর এক অফিস আদেশে এ সংক্রান্ত নির্দেশনা জারি করে। এরই মধ্যে এ আদেশের কপি সব জেলা-উপজেলা শিক্ষা অফিসার এবং শিক্ষাপ্রতিষ্ঠানের প্রধানদের কাছে পাঠানো হয়েছে। সূত্র-সমকাল (পৃ.৪,ক.৬), ইত্তেফাক (পৃ.১৯,ক.৩), যুগান্তর (পৃ.১৭,ক.৬)।

### সম্পাদকীয়

- ক. যুগান্তর : আগামী নির্বাচন সুষ্ঠু ও নিরপেক্ষ হওয়ার লক্ষ্যে আলোচনার মাধ্যমে একটা পথ বের করার ব্যাপারে প্রধানমন্ত্রীর বক্তব্যকে স্বাগত জানিয়ে প্রধানমন্ত্রীর বক্তব্য প্রতিফলিত হওয়ার প্রত্যাশা।
- খ. সংবাদ, সমকাল : স্যুরারেজ বিলের অর্থ ব্যয়ের স্বচ্ছতা নিশ্চিত করার পাশাপাশি নগরবাসীর বিশুদ্ধ নিরাপদ পানি সমস্যার সমাধান ও পয়ঃবর্জ্য নিক্ষেপন ব্যবস্থার আমূল পরিবর্তনের দাবি।
- গ. জনকণ্ঠ : ভেজাল খাদ্য উৎপাদন, বাজারজাতকরণ ও বিক্রয়কারীকে আইনের আওতায় এনে শাস্তি নিশ্চিত করার সুপারিশ।
- ঘ. প্রথম আলো : দেশের বিভিন্ন প্রতিষ্ঠানে কর্মরত বিদেশীদের আয়কর দেওয়ার জন্য চাকরিদাতা প্রতিষ্ঠানগুলোকে জবাবদিহিতার আওতায় এনে তাদের বিরুদ্ধে কঠোর ব্যবস্থা নেওয়ার আহ্বান।
- ঙ. সমকাল : সামাজিক যোগাযোগ মাধ্যমে চারটি জনপ্রিয় দৈনিকের নকল সংস্করণ ছড়িয়ে দেওয়ার ঘটনায় জড়িতদের বিরুদ্ধে কঠোর আইনি ব্যবস্থা নেওয়ার সুপারিশ।
- চ. ইন্ডিপেনডেন্ট : রাজধানী ঢাকাকে নিরাপদ ও বাসযোগ্য রাখতে বিভিন্ন সংস্থার কাজের মধ্যে সমন্বয় সাধনের দ্বারা যানজট, জলাবদ্ধতা, বর্জ্য অপসারণ ও সড়কগুলোর বেহাল অবস্থার সমস্যার সমাধানের সুপারিশ।
- ছ. ডেইলি সান : দেশের দুর্গম এলাকা বিশেষকরে পাহাড়ি ও হাওর এলাকায় সৌরবিদ্যুৎ স্থাপনে সহায়তায় সরকারি-বেসরকারি প্রতিষ্ঠানকে এগিয়ে আসার আহ্বান।
- জ. ডেইলি স্টার, প্রথম আলো : সাভারের চামড়াশিল্প নগরীতে কেন্দ্রীয় বর্জ্য শোধনাগার (সিইটিপি) স্থাপিত না হওয়ায় কারখানার বর্জ্যে ক্রমান্বয়ে ধলেশ্বরীর পানি দূষিত হয়ে পড়ায় অতিক্রম সিইটিপি স্থাপনের কাজ সম্পন্ন করার সুপারিশ।
- ঝ. নিউজ টুডে : চালের মূল্যনিয়ন্ত্রণে সরকারকে বাজার তদারকি জোরদার করার আহ্বান করে সম্পাদকীয় প্রকাশ।

### উপসম্পাদকীয়

বণিকবার্তা পত্রিকায় প্রকাশিত কলামে উল্লেখ করা হয়েছে, বিশ্ব বাজারে বলিষ্ঠ উপস্থিতি এবং

দীর্ঘমেয়াদে টেকসই প্রবৃদ্ধির ধারা বজায় রাখতে হলে বাংলাদেশকে অবশ্যই ক্ষুদ্র ও মাঝারিখাতে বিপুল সংখ্যক মানুষের কর্মসংস্থান সৃষ্টি করতে হবে।

#### নিবন্ধ ও ফিচার

যুগান্তর পত্রিকায় প্রকাশিত ‘বিশ্ব খাদ্য দিবসের ভাবনা’ শিরোনামের নিবন্ধে অভিমত প্রকাশ করা হয়েছে, বাংলাদেশে গ্রামীণ অর্থনীতির উন্নয়নের স্বার্থে কৃষিজমির অকৃষিখাতে, বিশেষত: বসতি স্থাপনে ব্যবহার বন্ধ করা দরকার।

#

খাদীজা/ফাহিমা/মরজিনা/রশীদ/তানিয়া/২০১৭/৯.০০ঘণ্টা